

Dêsan de  
Sûretê Ma  
Nimate

Roşan LEZGÎN

Şîr

*Uste*



# **Dêsan de Sûretê Ma Nimite**

**Roşan Lezgîn**

**şîr**

Kitab: 14

Şîr/3

Dêsan de Sûretê Ma Nimite

Roşan Lezgin

Çap: Can Matbaacılık

ISBN:975-98773-9-2

Îstanbul, 2005

Edîtor: Deniz Gündüz

Pêardişê Qapaxî: Talat Doğanoglu

Grafikê Qapaxî: A. Rahman Çelik

© Vate

Weşanxaneyê Vateyî

Adres:

Şehit Muhtar Mah. Nane Sok.

Kat: 3, No: 5/5

Beyoğlu/ İstanbul

Tel: 0212-244 94 14

E-posta: butkan@hotmail.com

e-mailê nuştoxî: rlezgin@hotmail.com

## TEDEYÎ

Destûr / 5

Ber / 6

Kilît / 7

Hubr / 8

Remayoxê Ziwanê Xo / 10

Ruho Vindîbîyaye / 13

Dêsan De Sûretê Ma Nimite / 25

Destanê Xo Bişawe / 27

Lete / 31

Wisarî Meheridne / 32

Zerrîya Mi de Mendê Rêçê Awiranê To / 33

Tutek / 36

Hewnê Mi Nêno / 39

Bêre / 40

Cuwîyayene / 43

Ti Dîyarbekirî Sînena Mi ra Hes Bike / 49

Heridîyo Şairêk Qewmê Xo ra / 53

Şîrî Şahid ê / 59

Mevacêne / 62

Awa Kewserî ya Areqê To / 63

Tenyayî / 67

Kela Dîyarbekirî / 69

Areyî / 70

Arêwan / 71

Soz / 72

Pird / 75

Felsefe / 77

Roşan Lezgîn, serra 1964 de dewa Dingilhewa ya Licê de ameyo dinya. Tenya çar serrî mekteb wendo. 1995 ra nat zafê kovar û rojnameyan de bi kurdkî (kirmanckî û kurmanckî) û tirkî nuştayê ey ameyê weşanayîş. Roşan Lezgînî bi kitabê xoyê hikayan (Binê Dara Valêre de) xelata edebîyatî ya Apec Förlag AB-2002 girewte. Hêna bi yew hikaya xo (Serkewtena Zerencan) Musabeqeya Hikayanê Domanan a Yewine ke Belediyeya Sûrî ya Dîyarbekirî organîze kerdebî de Xelata 2. girewte.

Eserê ey ke se kitab hetanî nika tamam bîyê, nê yê:

1. Binê Dara Valêre de, Çap-1. Apec-2002, Stockholm, Çap-2. Vate-2002, İstanbul
2. Li Bin Dara Bîyê, Elma-2003, İstanbul
3. Hîdayet Sadiq, Sê Dilop Xwîn (Wergerandina ji farisî), War-2004, Dîyarbekir
4. Samancı Suzan, Siya Bêdengiyê (Wergerandina ji tirkî), Aram-2001, İstanbul
5. Ferhengê Îdyomanê Kurdkî (Kirmanckî/Zazakî), Vate-2005, İstanbul

## DESTÛR

Nuŝtiŝ, awa heyatî ŝimitiŝ o.

## BER

Xellacê Mansûrî vano, "Eke merdim bizano kamca ra ameyo, do hol bizano ke şino kamca zî." Û Albert Camus zî vano, "Welatê merdimî yo raştikên, ziwane merdimî yo. Ez, sinoranê ey de nobete gêna."



## KILÎT

Her çekuye de boya areqê hezaran serrî  
Her çekuye de ruhê welatêkê esmerî

## HUBR

Boya hubrê qeleme  
Vernîya şinge-şinga şimşêrê goninî  
xo resnena heme welatan...  
Û Homayî bi xo zî rêça hubrê qeleme de xo nawit bi ma  
Homayîya xo bi ma evdan da qebûlkerdiş;  
(Ellezî 'elleme bîl qelemî...)

Şahî, sultanî, qiralî  
Amey û şîy  
Hezaran tîranî...  
Qesran û qonaxan ra çi mend?  
Kerrey helîyayî; bîy welî  
Tenya rêça hubrê qeleme baqî mend û mend.

Her kes rengê xo de rind o, her kes vengê xo de...

Çi wexto ke wisar destanê xoyê keskan ro mi keno derg  
Senî a game ez lewanê ey ra şimena poşmanîya teyrê Pepûgî:  
-Kamî kişt?

-Mi kişt!..

(Şîyayey tepîya nêagêrenê!...)

Û a kardîya ke ez misêwa fekê aye hesan kena

Ax destanê şima kamî ra damaranê mi birnena?

Na gonîya girênaya

Na gonî damaranê mi ra herikêna mîyanê zerrîya şima ra  
kamî?

Ax na gonîya ke boya hubrî tira yena!...

## REMAYOXÊ ZIWANÊ XO

Her kerra koyê xo rê xeml a  
Ey yara raştikêne ti ha ça?..

Her çekuye ruhê mi rê rîsalet  
Her çekuye welatê mi ra leteyêk  
Her çekuya ke tahmê aye

serê ziwane bapîranê mi ra yadîgar

Û her kelam latê destanê zemanî ra cewherêk  
Ax merdim ser a biremo zî maneno welatê xo!  
Wa asmên birijno mi ser verara xo ra

weşe bi weşe şênikan

Mîyanê zerrîya mi de hawarêko diçetel

Û mi zerrî devista abîyayîşê vilikan...

Ey remayoxê zîwanê xo!  
-Na sanike nîya ke ez vana!-  
Sond bo bi mergê mi û bi rojhilatî  
Her deyîra ke to xo dima verdaya sêwî  
Mîyanê zerrîyêka xezalêne de eşq bî  
Her dere vengê to ra herikîyêne  
Û sayêra miradan berzexê to de ya ey xerîb

Ey firarê vengê xo!  
Her pirdo ke ti raşanê  
Janê şikîyayîşê estikan de  
Boya çekuyan ano goristanan ra...

(Mi goş nayo vengê abîyayîşê vilikan ser  
Zeman sey royêkê harî herikêno destanê mi ra  
Û her keso ke kokê xo ra aqitya, meşrû nîyo êdî!...)

Ey firar!  
Wa sond bo bi araf  
Sond bo bi hesreta zerrîya ziwani  
Ti ser a biremî  
To dima şingînîya zincîra zewtan!...

**RUHO VINDÎBÎYAYE**

## I

Ez birîndarê ziwane xo ya, tewreyê mi de qijekîya mi ra janî;  
Lingî warpay bî, bêşelwar û ciwanîya mi ra şermêko xeşîm  
Şeşserrîya mi de xerîbîye ziwane mi kerdibi lal  
Sey sêwîyêk kuncê dêsan de ez menda tenya û mi zana;  
"Kuro-Muro, hani kuyruğun?!..." ameyêne çî mana  
Çimanê mi de şewqê şemlûlikan û qirika mi de gire  
Cewherê cewîyayene heba genimî bi mîyanê nekula teyran de

Tilismê heyatî mîfrazê ruhî de û her kes agêreno xo peynî de  
Kam hesranê xo ra alaweno herrîya xo û kam dûrî ra temaşa



## II

Nika îşaretan dîma gêrena ez mîyanê tarîfîya zemanî de  
Her xizîna ke kuzeyê xo de biya welêka serdine  
Mahzenêko xorî û bêpeynî kena a ruhê mi de...  
Û tilismê fekê her xizîna de ez newe ra bena zergûn  
Vengêko birîndar xorînîya ruhê mi ra çingeno û vano:  
-Ez destanê toyê hubrinan ra hes kena ey mecnûn!...

Ax zemanî mezgê mi tevîznayo, ez menda tarîxe de tecrît  
Ne zerrîya mi gemîya Nûhî de û ne zî mi şerbetê mergî şimit

### III

Kîmyaya rîsaletî mîyanê zerrîya mi ra wanena  
Ez bi linganê xoyê lexeran xerîbê ruhê xo ya  
Mi mûreyê xo kerdê vindî gelîyanê zemanî de  
Wela mi vayê heme welatan ra bîya vila û bêwelat  
Û her royo ke vejêno vernîya mi, pirdê xo raşaye  
Ax ez rêwîyêko vindîbîyaye ya hafizaya dewranan de

Peynîya peyine de her dewran roj û rengê xo esto newe  
Nika ruhê xo dima gêrena ez bi zêhnêko felcbîyaye...

#### IV

Ey her keso ke qatîlê ruhê xo yo û maneno mi  
Ey teyrê macirî û pencereyê tarî, perdanê xo akerêne!  
Bigêrêne xo rê çimanê mi û biewnîyêne xo ra dima  
Goş bidêne sanika teyrê sîmurxî û goş bidêne vatişî;  
Her vate welatê koyanê sipîyan ra şima rê çengêk roşn  
Û vatiş saw ra nîyo mîyanê tarîtiye de, bizane ey xerîb...

Her qendîle rojhilatî ra roşn dana rîyê şimayê raştkenî  
Ax şima rîyê xo nimnenê, ey sînayoxê qestikênî!...

## V

Gevzika cehaletî de gevizîyaya ez qatilanê xo rê şîya secde  
Şa bîya bi vindikerdişê ruhê xo û yew vengane de pûç bîya  
Mi ayetî ezber kerdî, bîya sofî û mi nêdî xo rê yew dergah  
(Wina birînî estê ke ruhê merdimî de: nimatey û xorî de...)  
Mi birînê xo sey sirrêkê şerminî temirnaybî tarîtiya xo de  
Ax peynî de; mi qaşilê birînanê xo qeşirnay tenêtiya xo de

Çew xelaskarê çewî nêbi, her kes xo rê resûl  
Ax her kes qatîlê xo, her kes vengê xo de meqbûl

## VI

Tarîtiye de ez damaranê xoyê esîlan dima gêraya zaf wext  
Mi şikeftî dîy, fekê înan dêskerde û bi estikan dekerdey...  
Her çî wextê xo de weş bi û ma her çiyê xo de kewtîbî erey  
Çende rey mi xo kişt û yew çilke zî çimanê mi ra nêamîye  
Ez remaya xo ra, mi ruhê xo newe ra carî kerd çende rey  
Zemherîyê ruhê mi de zimma vengê zalimîya dinya  
Ax hafizaya puyayî kamî milde ya, tarîxe rê weledê zinya!

Her kes dara xo de gil o, her kes herrîya xo de meşrû  
Û mi ende xo ra hes kerd la mi nêdî birîna xo rê yew darû

## VII

Çende zêdîyeno huzin ende vateyî çilkenê çala birîne ra  
Her ke ez xo azad kena pencanê pêlanê na tirajedyâ ra  
Û şefeq neqîşêno gonîya mi ra, ax qewmê mi qatîlê mi!  
Ez xo mîyanê sanika xo de pêşena, qismet: boxça, tenyayî...  
Asmên sîmê xo rijneno û rîyê mi perçemê şewe ra bêhayî  
Ax şima nêvînenê a xincera ke sineyê mi de şîya war!

Şima sanika dimpiştikî zanê; dimê xo û jehrê xo de tacîdar  
Tabîran ra bibo welî no xîyal, her çeku qehrê xo de întîxar!

## VIII

Mi va ez xo rê ruhêk peyda bika, newe ra û tûnc ra  
Nêbo, ez xo rê welatêk peyda bika, meqsedêk û mirad...  
Pirdanê xo raşanî, rêçanê xo bidî vayî ver û îrsê sulala  
Newe ra bengîn biba seba a karhezala Gelîyê Çewtela...  
Ax hewnê mi versîya ruhê minê vindîbîyayî de mendî esîr  
Û zincîra aîdîyetî sey marêko birîndar ro xîyalanê mi lefêya

Her kes aîdîyetê xo ra morkerde bi, kunya xo mermer û tûnc  
Û mi zana, sînore hewnan zanayîşî ra zaf wetêrî û meçûl!...

## IX

Mi her di destê xoyê hubrênî sey di şaxanê nazikan ramitî  
Zimistanî da piro, pûk ser de şî û xezeb û bêwayîrî...  
Mi kefarete xo da, qiyamet û meşerê xo vîyarnay  
Mi fêkîyê Baxçeyê Adenî serê engîştanê xo ra çînay  
Û mi kederê xo ra ezber kerde na sanika raştikêne

Ax her kes qiyametê xo ano û her kes meşerê xo  
Her kes Adenê Baxçeyê xo yo, ey xerîbê welatê xo!...



## X

Rojê mi melûl û çî wexto ke ez ewnêna tarîxa qewmê koyan ra  
Zerrîya mi de çingîniyêka sofîye, se kardîya ke sawîyena dêsan ra  
Şimşêrê mi çin o helbet, îdeolojîyê tahmgizûnî mi ra dûrî  
Dare bi darîtiya xo daristan de, mi rê utopya bî sey her şairî  
Ne çew rojê mi rê mertal û ne zî versîya mi çewî rê sîwan!...

Belkî hewnêko hewtreng bi hewarê mi arafê yew hêvîye de  
Belkî zî erênayîşê yew bilête bi, sefero peyinê yew tirajedyâ de

## XI

Ez ko şorî helbet, mi va wa janê mi û çend vatey bimanê yadîgar  
Ey qewmo ke xo rê çimsûr, aîdîyetê xo de xesênaye û famkor!  
Bena ke şima vajê, "Yew ehmeq bi, adirê xo de xo veşna û şî!..."  
Belkî zî her kes bi yew mûme agêro û awan biko yewna rojhilat  
Û bena ke qîyametê xo de newe ra şên bibo no welat...

Eke vilêka sûre bîye zergûn her aşma gulane serê gorê mi de  
Ciwanêko çeleng wa biçîno û biko mîyanê porê yara xo de...

## DÊSAN DE SÛRETÊ MA NIMITE

Verara her di çeman kewayî  
mîyanê her di çiman awî  
hezaran serrî verê cû ra  
verara her di çeman de  
vengo esmer ê qîncelan...

Tewreyê şiwani de leteyê nanî  
çilekiya biza kole  
û her aşma nîsane  
koyanê welatê mi de zîlê ribêsan...

Verara her di çeman mij  
mîyanê her di çiman sûrayî

Virso  
gama ke rehma hewran ra virsêno  
mijdîyana varanî ya herrî rê  
(mijdîyana ma nimita...

Loma zî,  
eynike de sûretê ma şikite  
dêsan de vengê ma nimate!...

## DESTANÊ XO BIŞAWÊ

Ramûsanê to  
mîlçika sibate  
û zerrîya mi...

Verara bêvengîya şewanê mi  
sipeyîya çicanê to de beşna Sîpanî  
teşnê lewanê mi  
û lepanê ma de hewrê hamnanî...

Şewê ma deerg, derg  
loorî, lorî...

Vayê Çewtela  
xuşîniya pelanê gozêre de  
û çimê ma hetanî fek bi asteran dekerdey...

Dêsanê ma de nexşê şahmaranan.

Ey awa Munzurî  
ti bi hesreta zelalîya xo bika  
vaje mi ra  
ma seba çi rijney karîbanê xo?...

-Heme îsanî sey d(wan) ê-

Milçikê!  
Ka hela ti mi rê nexşeyêk xêz bike  
keweyîya asmênê xo de  
wa qe bêname bo...

Reben û rincanê evdalan ez a  
tûjikîya Tûjikî de.

Rayîrê mi  
dûûûr

derg...

Çimanê mi ra bigîre heta bi çimanê to.

Ez vana: -ti nêna!

Ka to vîyêk porê xo ra bişawitêne  
şewdirêk de...

Hêy!..  
Vengê mi  
vengê mi nêno to?  
Ez vana: -ez gelyêk a, gelîmî  
lewan ra zimistan dekerdî  
gilê mi qerisîyay Azgilêr de  
xorî..  
Heme hewnê mi vewrêse Koyê Sipî  
viran...

Ganî nika germinîya destanê to tîya bîyêne  
tenya germinî  
û destê to!



## LETE

Zerrîtenika mina keweyine  
Aseno  
Çimanê toyê zelalan ra laserê hezkerdişî herikêno...  
Ez zana ha!  
Ti mi ra zaf hez kena zaaaaf...

Ez nêwazena endêk zaf ti mi ra hez bika  
(Meheridîye ha!...)

Vila ke, vila ke...  
Heskerdişê xoyo asmênin vila ke;  
Na kevza ke kera wa dusaya  
Na mîlçika ke meli fek de bena halinê xo  
Na vilika sûre  
Boya areqê nê paleyî ra  
Û heme welatan ra hez bike...

Eke ti hez bika  
Do pahra mi zî tede bo  
Bizane!  
Ez zî yew lete ya  
To ra  
Û heme ra  
Yew lete...

## WISARÎ MEHERIDNE

Çimengura mi  
werrekna to bizanêne  
mi çiqas bêrîya to kerda  
boya rêça lewanê to porê mi de  
û bêrîya to yew kalme  
zerrîya mi de çikîyaye...

Tî zana vilika mi?  
Nika tîya, to ra dûrî  
vartîyêka hurdî varena  
boya hîbûna serêşutîya-to  
xo reyde ana û resnena lewanê mi  
û ez  
çilkanê hesran nesilnena zerrîya xo...

Lewhengemîna mi  
nêbo ha!...  
Çi rey  
ti vartî nêvarnê çimanê xo yê hewrinan ra  
û ti  
wisarî nêheridnê rîyê xo ra  
Do pêro vilikî bivilişîyê!...

## ZERRÎYA MI DE MENDÊ RÊÇÊ AWIRANÊ TO

wisar o  
wisarê nêrgiza mi  
newe abîya...

xêlî bi xemla ti, henga mi  
gama ke ez bi çiman ameyêne ramûsanê lewanê to  
çimanê mi de şilîya şerman  
to mi ra dîr berdêne...  
to da ray û ti şîya  
zerrîya mi de mendî rêçê awiranê to.

ti nêşîyêne!  
ma şan bi şan sîneyîş pawitêne  
û ti şîya  
rismê şîyayîşê to awiranê mi wa aliqîya...

sûsika mi  
huyayîşê toyo nîmcet  
janê mi...

de şo  
ti berrîya vewre ya êdî  
kaleka mina çepe de...

(...!...)

nika:

ez tenê ya, bê to  
vîrê mi, xîyalê to  
û lewê Dîjle de awa lêle  
wazena gunanê xo û to pîya birijnî  
ax xuşşînîya pêlan  
mi xapênenê bi ameyîşê to!...

## TUTEK

tutek!

janê toyo bêfam sipeyîya didananê to ra çurisêno  
fekê toyo akerde de  
û huyayîşê toyo qurmûçnaye çimanê mi de cemidîya...

tutek!

kamî huyayîşê to qurmûçna-  
kamcu vayî to kirişna qeraxê nê şaristanî?  
sergo halînê xaranê to bi qey?  
letêk nano kufikbîyaye  
û destê toyê virikinî...

çerekanê rîyê to de nexşeyê welatêk vindîbîyaye...

oyy oy tutek!  
ruhê mi  
wa ruhê mi lîlikanê to de bicemidîyo  
ti bi kamcu ziwani bermeni lo-  
ti bi kamcu ziwani qisey kenî, ha?!...

ero tutek!  
nê hesrê to yê, lewanê mi ra çilkenê  
(wa boya lewanteyî rêzikanê şairan ra nîyo êdî...)

tutek, tutek!...  
hêvîyê to zerrîya mi de pirpirok ê  
-baskê înan şikitey...

ax tutek!  
werrekna  
ma kendalanê Kosûrî de bîyênê nika  
binê dara tuyêre de  
şîlêk pîyaz û letêk nanê tenûre  
destanê ma de...



## HEWNÊ MI NÊNÔ

ez nêzanena  
bena ke nika şan bo  
teber a  
belkî şewe herikêna verara hewnî...

ez zanena  
qevdê destanê mi de janê asinî  
rêçê elektrodan mîyanê linganê mi de  
zere de  
û çimê mi gêrîyenê...

ax senî ke çimê mi gêrîyênê  
ez welatêk vînena  
lete bi lete  
û mîyanê gola gonî de...

ez çimanê xo akena  
na rey;  
çar heme hetê mi dêsî  
sey mi  
bêziwan  
û uryan!...

## BÊRE

hehecikê  
qelancikê  
dimqemçikê!...  
bi baskanê xo  
meqelişne keweyîya asmênê mi lê!...

ax!...  
destê mi  
destê mi nêresenê to...

hehecikê!  
mi rê mîrat menda versîya tarîxêka sofîye  
ez çi welî xo ser kerî  
û to rê  
rindê  
çi mîrat verdi?

rîyê to;  
maskeyan diznayo  
rîyê mi;  
nexşeyêko perritnaye

bicawe!  
vînce bicawe...  
(tersena aqbê desmalkaxizêk bîyo to ser de)

bêre, bêre!  
ez pabeyê to ya, lê lêê...  
agêre rindika mi  
vereşanêk  
leweyê Dîjle de  
ma şitê xezalan bidoşin  
û wa boya pûnî biperro lewanê ma...

erê hehecikê  
de bêre!  
mi memirêne, bêre  
kuçanê çimanê mi ra bivêre  
wa porê to vayî ver de bireqisîyo  
û ez  
boya şîfran bilêsî viranîya to ra  
erê rindika mi?...

## CUWÎYAYENE

Seba ruhê Dost Çiyayî

Cuwîyayene deyîrêka kan a  
Serê ziwane babaderwêşêk de  
Mîyanê lewanê qereçîye de falê destî  
Cuwîyayene tizbîyêka karîban a  
Serê dezgeyê kalêkê entîkerotoxî de  
Û xincerêka destesedefên a zemanê verî ra menda..

Ax na cuwîyayene; kayêka elebqulab a!...

Cuwîyayene rêwîfîyêk a bîyayîş ra hetanî merg!  
Her qonaxêkê nê rayîrî de ma her yew rêwîyêko bakîr  
Asparê astorêka rewane û çargamî  
lewe û leweyê kaş û kendalan de...

Ax na cuwîyayene!  
Na cuwîyayene kênayêka xama ya  
Şewan ra nêmeyê şewêk de  
verara dadîya xo ra wurzena  
û xortê şarî dima remena...

Û ma?  
Ma teyrê macirî  
(Macirê ziwane xo!...)  
Ma her yew gemîyêka bê lengergeh ê  
Mîyanê pencanê pêlanê cuyî de...

(Ax ez! Derwêşêko bê erbane, sofîyêko bê dergah a ez. Kamcu gelî halînê ruhê min o? Herrîya kamcu kendalî rengê xo dayo ra xulqê mi. Û vayê kamcu koyan simbilê mi serridnayî?...

\* \* \*

Gelo na senî yew rebenî ya ke merdim welatê xo de sey maciran biciwîyo û seba heskerdiş û wayîrvejîyayîşê a herrîya ke merdim ser o ameyo dinya, nan û awa aye werda, her tim xo rê mazeretan peyda biko?...

\* \* \*

Gelo hemeyê cuyê merdimî de tenya yew vîsteke çin a ke merdim heme waştîşanê xoyê heywanî bido kîşte, a dinyaya xo ya tarîye ra -tenya yew vîsteke- vejîyo teber û bi awirêko asmênin biewnîyo dinya ra; xo û êyê bînan, şarê xo û şaranê bînan muqayese biko?...

\* \* \*

Ax ma nêzanenê ke leyîr bi pencikanê xo çûleyê hakî şeqneno û xo erzeno verara roşnayîya rojî û her wisar pûrtê xo newe ra xemilneno...

Ma sanika teyrê Sîmurxî zî kenê xo vîrî ra û ma nêzanenê ke Zumrudê Anka welîya xo ra xo xuliqnena newe ra...)



Gelo ma korrfam kewtê  
Ya nê koyî sey hûtanê hewtsereyan mexel kewtê,  
Ma ra kam hewnê mergî de yo?...

(Eke nê koyî mîyanê sanikanê zemanê verî ra  
vejîyê û wurzê xo ser,  
ma do bi kamcu rîyî biewnî înan ra, ha?!...)

A çi teyrêka delal a

her Hezîrane de hezrê xo kena

Halînê xo nana ro gilânê dara mazêre ser...

La kamcu leyîro şitheram dest bi perrayîşî keno

Êdî xo dima nêewnêno û şino hey şino...

Ax no welat!

No welat, welatê kamî yo?

Ey Dostê Koyan

La to no welat kamî rê verda û ti şî hey şî?!...

## TI DÎYARBEKIRÎ SÎNENA MI RA HES BIKE

Berê Koyî ra hetanî Berê Ruha  
Gaman peymawena ez  
Ver û verê bedenî de...

Vayêko honik sipeno  
Vayê koyan...

Boya rîhanî tede  
Vakur ra yeno, nermek  
Xuşşînî kewta pelanê çinêyeran ser  
Valêrî porê xo şane kenê vayî ver de  
Xubêrî boyêka xumrî resnenê heme ca  
Çîve-çîvê meqesokan a, mîlçikî bi wîle-wîl  
Porê bedenî; çokêk vaş

Sereyê mi xoş  
Canê mi mest...  
Xîyalê mi de abîyayîşê vilêka sûre  
Û serê engîştanê rojî ra ez  
Sosinan çînena qevd bi qevd...

Tiya şerq o; yanî Dîyarbekir  
Şinge-şingê tasanê sifrênan a  
Awa sûsî roşeno Bavê Elo û kênekî tuyan;  
Lewê înan "qere hubur"

Dûyê kebabê cîgere vila beno  
Binê ziwane mi de tahmê çayêka qaçaxe  
Û zinca mi boya titûnê Helhelî ra pîrr  
Ez tewirêna ya ewro; sermest  
Zerrîya mi yew pîrpirok a ewro

Rîyê asmênê nîlgunî de hewrê gulanî  
Vayî dest dano hewran û yena war:  
Reşêşêka hurdî...  
Dima ra, asmênê Dîyarbekirî de  
Keskesûre bena keman  
Kerreyê dêşê bedenî sereşute  
                    Awin-awin huyenê  
Û kewe-kewe beriqênê pelê daran  
  
Dîyarbekir o tîya; heme ca rengîn...

Kênekêk wet ra yena; esmer-esmer  
Çimê aye mîyanê zeytî de çutêk zeytûnî  
Û lewanê aye ser o çilkê vartî  
Poro sîya vayî ver de rewan...

Mîlçikî wanenê  
Û ma, çimanê yewbînan ra awiran remnenê  
Alişkanê ma de vilî abenê  
Di zerrî: di pencereyê akerdeyî;  
Di boranî sipî-sipî perrenê qefesan ra  
Û ma çimanê yewbînan ra şerab şimenê:  
-Noş!  
-Noş!...

## HERIDÎYO ŞAÎRÊK QEWMÊ XO RA

reçesêna rîyê awe de sûrayîya rojawanî  
û cuwînek bêwayîr mendo latê deşte de  
versîya koyan kewta dewêka veşayî ser  
laşêk asêno versîya tihokêre de  
û laşwerî werdişê laşan ra giran...

şewşewokî şewişênê verara şewe de  
kundêk waneno gilânê tuyere ser o  
valêre porê xo rijnayo mîyanê awa çemî  
û o ziwano ke vayî ver de reqisêno, ax!...  
lal beno mîyanê lewanê şarêkê xemsarî de



binê roşnayîya tîjeaşme de kerreyê xemgênî beriqênê  
daristano por-gijol mendo pejmûrde;  
pepûg bermeno, şaîr naleno, çem zimeno...  
darêka zeytûne hesran kena war herinda zeytî de  
û heme qisey qesîyênê fekê şarêk de...

çekûyan ra pirpirokan perneno şaîr serabê xo de  
misre bi misre warizneno qesran û sarayan  
ronište yo serê kerra de, leweyê royî de, tenya  
bermeno şaîrêk emşo; heredîyo helbet!  
hêrîşê awaz û nexmeyan ra esirêna zerrîya ey...

koyî bêveng, şewe serdin, şair bêhal...  
rayîrê xo şaş kerdo şarî; goşî kerr, fekî lal  
lingî rincan, şewe şad û aşme şîya awan...  
heredîyo şairêk qewmê xo ra; verê xo tada:  
kerrey varey ro qewmêk, zerrîya şairî şikîya!...

simbilê genimî bi şaîr; weşe bi weşe latê deşte de  
cehaletîya dostan ra, xezebê dijminan ver  
mîyanê xeleyî de sey lema zîwane tenya mend  
û dohnê çila çikîya; tarîti hêrîş berd qewmêk ser!...

## ŞÎRÎ ŞAHID Ê

Nê şîrî  
nê şîrê hesretan û hesrinî  
Her şîre desmalêka mûrekerda û neqîşnaya  
Û her sanika ke dapîre ra yadîgar menda  
Zereyê sindoqêka sedefan ra neqîşnayî de nimita...

Ey qewmo ke ziwana dest ra gêrîyayo û sêwî  
Neslê peskovîyan ra çi mendo destê ma de?  
Helbet koyê ma hema zî bakîr ê  
Koyê ma hema zî xînamî yê asteran rê

Û şewqê aşme ma rê çimşikitişê waştîyêka şermokine...

Halînê tenêfîya mi de newe ra xuliqêno asîman  
Ez tenêfîya xo de zêdîyena her şefeqê welatê xo de  
Ez tenêfîya xo de hes kena şîma ra ey qewmê koyan  
Bêrêne û bêvînê  
Welatê şîma senî resayo umrê pêxemberan...

Û pêşê koyan de her kerra şahid a mahkûmîya ma rê

Her hafizaya ke kilît biya rêça xo de bena a  
Û her zeman û rojêkê xo esto helbet  
Versîya welatê mi xatirayêka xerîbe û mehzûne  
Mi ewnîya dîrî û nîzdî ra û mi dî  
Hemeyê hêkelan secde de bîy kerra  
Û her kes hewranê xo ra varabi newe ra...

Ax înanê ke umrê xo bîlasebeb telef kerd  
Heme qapsûnê înan pûyayî  
Û ma zîwanê yewbînan ra fam nêkerd û nêkerd!...

## MEVACÊNE

wus bêne!  
mevacêne...

mi tenyayî dîya  
mi mergê embazan verara xo de dîya...

wus bêne!  
mevacêne  
veng mekerêne  
zerrîya mi;  
                  tenike û ende zî barî...  
ha visya ha visyena ha!...

kul, keder û kerban  
axîna şêrgelan  
şitlê rîhanan  
meyarêne ziwan  
besss!...  
mevacêne  
wîsewîsêka qijeke zî  
êdî ginena zerrîya mi ro...

09. 12. 1977 - Dîyarbekir



## AWA KEWSERÎ YA AREQÊ TO

talan bi talan  
sotin bi  
rem bi!...  
gama ke vereşanê gewrî agêrayêne rengê gonî  
kuçane ma de virêcîyayne boya mergî...  
ma şitlî bînerd kerdî  
bê kefen  
                    bê şîn  
                                    bê helalî û xatir...  
û her tim  
tilîfîyêka sipîye mîyanê di engîştan de...

tarîtiya şewanê awran de  
Bêrivanan ma lewney  
pistinane xo ye tîjenêdiyayan ra  
Zilanan zil da zerrîya ma de  
heme gilê daranê xo ma birney  
û ma xo newe ra şut bi hesranê dayikanê sêwîyan

de hadê!

wurze û meşermaye

meremne çimanê xo awiranê minê sojnayan ra

bikewêne birînanê mi

awa kewserî ya areqê to

han to rê gonîya mi

newe ra birêse rêzikanê Xanî rîpelanê peyînan ra

hadê!

racane na sanika Habîl û Kabîlî  
na tenîya çareyê mi wa, vila ke  
qalindê heme çî dîyayo  
huyayîşêko sereşute biperrne latê xo ra  
û şane bike gilane Gilgamêşî...

## TENYAYÎ

Kam eşkeno mi rê vajo  
pirpiroke  
bi çimanê xoyê keweyênan  
çi wazena vilike ra?

Ax kam pê zaneno  
mîyanê okyanosî de  
bi tenêfîya ê maseyê sîyayê qijkekî?

Kam eşkeno mi rê biperno  
huyayîşêkê xoyo wisarên  
şirpênîya baskanê boranêka yabanîye ra?

Ax kam eşkeno pê bizano  
mîyanê ende qelebalixî de  
zerrîyêka macire  
senî tenya tenya  
tepe-tepê aye ya!...

## KELA DÎYARBEKIRÎ

Hêy gîdî Kela Dîyarbekirî!  
Hezar sond bo to rê  
Ez vana:  
-Bextê to rengê to ra yo!..

## AREYÎ

Şîfran doşena çimanê yara xo ra  
Çirr bi çirr  
Elba zerrîya xo pê kena pîrr.  
Amîn kena  
Şanena...

Yare rê şewdiran de kena areyî  
Şanwanan şamî yê  
Nê şîrî...



## ARÊWAN

Hêy arêwano!  
Paştqulûzo  
Porsipîyo  
Qeraşwano!...  
No çî yo yeno to sere de lo?!...

Her serre  
Laserê nê feratî  
Sukrê to şaneno ra  
Arêye şino  
Maneno çeççeço...  
Û ti newe ra  
Kewnê çeççeqoyî dima  
Sukir girêdanî û saz kenî arêye...

Ne laser mird beno raşanayîşî ra  
Û ne ti benî rincan viraştîşî ra...

To emserr zî viraşt  
De ma rê bitehne derd û kulan  
Bitehne hêvîyan!...

## SOZ

Versîya heme zemanan kewta ma ser ey birayan  
Û eşq gilânê mazêre ser o  
Halînê mîlçikêka xeşîme de mend...

Çikole çikoleyî ser de girewto birîna ma  
Ey birayê minê masum û dûrî  
Bîr nêbi nesîbê Yûsîfî;  
Eşqê Zuleyxa bi mirad  
Û toqa tometî milê vergî de mende!...

Ey birayan!

Ma her yew hewnanê cinîyêka şehwetine de Melîkê Misrî

Belkî zî bîrêko bêbin ke hema ma nêdîyo de Yûsif...

Ne ma bin ra merdî

Kurdîstan de

Û ne zî ma bi gan û goşt gane mendî...

Ey birayan!  
Mi qewirmayî asmênê ma ra  
Hemeyê asteran, aşme û rojo zûreyin  
Meydanê astoran de mi çalî kendî  
Û ez sey awa çemî herikêna birayanê xo rê

Gonî nêbena awe û hubr çilkeno çimanê mi ra  
Nika nameyê xo û birayanê xo ser o, ez qîrena:  
-Ey qewmê gonîwerî  
Şima heme erdê dinya ro xo bare kerdo  
Bêrêne!  
Yan ma heme kitabana pa tarîxe wa biveşnin  
Yan zî mi û birayanê mi rê verdêne welatê mi...  
25. 04. 2004

## PIRD

Heme birînê mi şarê mi ra yê  
Û ez tim bakîr a vera heme awiran...

Mi ra pey û mi ra ver  
Yew silime : palikê aye puyayey  
Ez mîyanê di zemanan de menda  
Zendê mi girêdayey...

Yew destê mi de bêhêvîtîye nalena  
Desto bîn de hêvî reqisêna  
Û îksîrê roşnayî mîyanê pencanê tarîtîye de  
Çimê mi zî di eynikê sêhrin ê  
Mi rê û to rê...

Wazena waye be yan zî bira

Bêre!

Yan ma heme pirdanê xo raşanin bin ra

Yan zî ma her yew bibê pirdêk newe ra!...


## FELSEFE

Eke ti tamamê zemanan de  
Ezel ra ta ebed nika cuwîyayî  
O yo kehanet.  
Û xîyalê to çende gird ê  
Temen to rê ende kewt!...











Mi her di destê xoyê hubrênî sey di şaxanê nazikan ramitî  
Zimistanî da piro, pûk ser de şî û xezeb û bêwayîrî...  
Mi kefarete xo da, qîyamet û mehşerê xo vîyarnay  
Mi fêkîyê Baxçeyê Adenî serê engiştanê xo ra çînay  
Û mi kederê xo ra ezber kerde na sanika raştikêne

Ax her kes qîyametê xo ano û her kes mehşerê xo  
Her kes Adenê Baxçeyê xo yo, ey xerîbê welatê xo!...



ISBN 975-98773-9-2



9 789759 877392